

Qalam

Bilangan 101 Jamād al-Awwal 1378 Disember 1958 60 sen

Membawa orang-orang China Islam ke Malaya

Berbagai-bagai pemikiran telah timbul mengenai rancangan

Perdana Menteri Persekutuan Tunku Abdul Rahman hendak membawa masuk orang-orang Islam China yang terlantar di Hong Kong yang telah melarikan dirinya dari negeri China Komunis. Sebahagian daripadanya, termasuk anggota-anggota UMNO, sendiri dan juga PAS yang membangkang dengan keras kebanyakannya mereka memberi alasan bahawa hendaklah terlebih dahulu disempurnakan keadaan rakyat di negeri ini baharulah kelak kita akan dapat menolong saudara-saudara kita yang menderita itu. Dan ada pula diantaranya mengatakan kenapa tidak mau membawa masuk ke mari pelarian di Palestin pada hal mereka pun sama-sama orang-orang Islam yang wajib ditolong.

Fikiran-fikiran yang timbul itu sudah barang tentu terjadinya kerana kurang pengertian dan kurang keyakinan kepada ertiannya tolol menolong dan tidak mengkaji akan faedah daripada pertolongan yang bakal diberi.

Cubalah kita halusi dan berbalik kepada perkara itu dari pangkalnya, dari permulaannya. Rancangan Tunku hendak membawa masuk orang-orang Islam China yang terlantar di Hong Kong itu, menurut yang kita ketahui,

adalah setelah beliau melihat penderitaan mereka di sana. mereka hidup di rumah-rumah yang dibuat daripada peti-peti sabun dan mereka terpaksa menumpang dan tinggal di tempat-tempat orang-orang kafir. Mereka pergi ke Hong Kong setelah mengetahui bahawa kebiasaan beragama dihapus di negerinya dan orang-orang agama dijadikan orang-orang buruan dan kerana kuat imannya mereka tidak reda tinggal di sana dan mereka lebih berkenan hidup susah daripada menjadi orang-orang yang akan dikeluarkan dengan paksa dari agamanya.

Setelah mengetahui ini semuanya, maka setelah mengadakan penyiasatan, maka Tunku dikatakan terus membuat azam akan memberi peluang mereka datang ke Persekutuan Tanah Melayu. yang diluluskan Tunku untuk datang ke mari adalah di antara 50 dan 100 orang sahaja - iaitu daripada mereka-mereka yang difikirkan beliau munasabah dan berfaedah pula kepada Semenanjung ini, terutamanya di dalam perkara-perkara mengenai agama Islam.

Cadangan Tunku yang mulia ini, sebenarnya bagi umat Islam, wajib menyokongnya. Tidak sahaja menokong langkah Tunku itu tetapi juga wajib digalakkkan sebab selain daripada kita membantu orang muhājir, yang berpindah kerana desakan tidak dapat menjalankan agamanya jadikanlah kita ini sebagai orang-orang Ansar pada zaman Nabi yang menerima Muḥājir dengan dua belah tangan mengurangkan penderitaan mereka, iaitu selain daripada apa-apa yang kita harap daripada mereka di dalam usaha yang besar iaitu di dalam cara mengembangkan agama Islam di negeri ini terhadap kaum bangsa mereka. Ingatlah sedangkan Najashi menerima orang-orang yang berhijrah kerana desakan agamanya maka mengapakah kita umat Islam sendiri mesti menolaknya dengan beralasan kepada dasar kebangsaan dan kebendaan, yang seolah-olah

dijadikan sebab yang utama dengan melupakan kekuasaan Allah.

Kita dari mula lagi menetapkan pendirian bahawa kita menyokong penuh rancangan Tunku membawa mereka ke mari kerana kita yakin tentulah mereka diberi syarat-syarat yang baik untuk kita di dalam usaha mengembangkan cita-cita Islam yang kita rasa Tunku sendiri tidak mau menerangkannya kepada umum sebab harus faedah yang bakal kita ambil itu akan disekat oleh orang lain, lain daripada golongan kita, apabila mereka mengetahui ke mana tujuan kita.

Sebab itu kita minta kepada umat Islam seluruhnya, bermenunglah seketika dengan tenang sebelum mengeluarkan fikiran dan pendapat di dalam hal ini. Janganlah terikut-ikut kepada hasutan-hasutan dan galakan-galakan dari fikiran akhbar yang bertopengkan agama tetapi hakikatnya membenci agama. Janganlah hendaknya kita umat Islam menjadi orang-orang kebangsaan yang lebih mengutamakan rasa kebangsaan daripada rasa keagamaannya, dan melebihkan kebendaan daripada kelimpahan Tuhannya.

Bagaimana perjalanan PAS?

Di dalam keluaran Qalam bulan Oktober kita telah mengulas dan mengingatkan perjalanan PAS yang dengan ringkasnya, kerana semboyan-semboyan yang selalu disebut PAS, menimbulkan pengertian kepada kita bahawa perjalanan PAS tidak lagi seperti asalnya tetapi kita takuti perjalanan PAS akan dijalankan oleh pimpinan-pimpinan kepada jalan perjuangan kebangsaan yang bertopengkan agama, yakni berjuang atas nama agama tetapi menjalankan tujuan-tujuan dan dasar-dasar kebangsaan yang dijalankan oleh parti-parti kebangsaan.

Hal ini dapat kita ambil daripada kesan-kesan perkataan pimpinan-pimpinan mereka sendiri, di dalam ucapan-ucapan yang mereka buat dihadapan umum. Hal ini lebih-lebih lagi apabila Setiausaha sendiri, Ustadh ‘Uthman Abd Allāh telah menyatakan kepada umum, seperti yang tersiar di dalam akhbar bahawa ia membantah akan rancangan Tunku Abdul Rahman membawa masuk orang-orang Islam ke Persekutuan Tanah Melayu.

Ucapan ini adalah menjadi suluh kepada perkara-perkara yang samar-samar dahulunya untuk menentukan ke mana sebenarnya PAS telah dibawa oleh pemimpin-pemimpinnya. Hal ini sebenarnya tidak boleh dibiarkan jika sekiranya dasar PAS adalah memperjuangkan suatu cita-cita yang disebutnya untuk menegakkan hukum Tuhan di negara ini dan untuk membawa umat kepada jalan yang dituju: “negara bahagia yang dilimpahi Tuhan!”.

Cubalah PAS berfikir sejenak! Melihat kepada perkembangan-perkembangan yang ada sekarang – apakah suatu langkah yang wajib dibuatnya untuk menegakkan hukum Tuhan di negeri ini (Persekutuan) sekiranya umat Islam tidak sampai separuh kerana umat Islam sendiri banyak hanya bernama Islam tetapi tidak yakin kepada perjuangan Islam.

Adakah hukum Tuhan itu akan dapat dilaksanakan di dalam keadaan ekonomi umat Islam sendiri di dalam keadaan lemah? bagaimana kita hendak melaksanakan cita-cita itu kalau sekiranya orang-orang yang di luar Islam lebih tahan lebih kuat kedudukannya?

Soal-soal inilah yang kita umat Islam yang berjuang di atas dasar Islam mustahak memperjuangkannya dan